

編號 1 號

【生趣个童年】黃美貞原作

還細時節，細人仔無電子產品做得搞；毋過，屋簷下、杌仔樹下、伯公下、大圳溝該、竹林肚，做下都係佢兜个遊樂園。

佢兜四姊妹，還過鄰舍个細人伴仔，輒常湊等份家啦飯仔、搞紙擲仔¹、搞園人尋等等，係堵著毋使讀書个下晝頭，定著愛搞到斷烏，等到大人擎等竹修仔來尋細人仔，大家看著毋修勢²吔，正溜瀉。

好天好時，佢兜乜好在圳溝肚覓蜆仔。有一擺，沙鼻个老弟喋喋滾，同大家打賭講佢捉得著細蝦公仔，上屋个阿賢好擲擲仔應：「該愛仰般賭？」老弟誚難佢：「你係捉到比佢較多，暗暗夜佢就請你食夜。」阿賢堪毋得人翕³，應講：「好，無問題！」該下晝，佢兜先攔水窟，想撈蝦公餵到水窟肚，毋過，細蝦公仔哪有恁該捉，兩下半仔蝦公就躍走哩，佢兜試著無意思，早就走淨淨。無想著佢兩儕定著愛比到有輸贏，目珠眨都毋眨，搵到一

身落潦、扃扃糟糟合泥了了，水窟肚就單淨攔著兩三尾細魚仔定定，等到暗摸胥疏吔，佢兜正無結無煞、遽遽轉屋。管佢麼人輸贏！係還毋轉屋，毋單淨無飯好食，皮還愛弓脛啊正做得咧！

還有一擺，下晝頭當翕熱，佢兜恁多姊妹在屋側角搞園人尋。老弟係搞頭王，滿哪仔都尋得著來園，搞幾下輪都搞毋得煞棚。無想著，坐在屋簷下个阿婆大聲喊講：「遽遽轉來啊！莫在該頭牛眼樹下搞，該位盡多草鞋搭⁴哦！」頭擺个細人仔輒常打赤腳搞到毋知頭天，樂線樂線个佢兜，無撈阿婆个話聽入耳。結果，做鬼捉人个老妹忽然間看著該生到烏疏疏、有十過公分長个弄毛蟲，對等佢趟過來，佢嚇到尾瀉屎、走都走毋掣，嘎「哇！」聲仔敷出來！嶄然好搞个老弟，興蹩蹩仔行兼想愛逐該尾草鞋搭，阿婆閱悴悴仔咄講：「你係畀趟到圓身頂，該就貓拖粢粢啊——難敲爪哦！」

「良言莫嫌少，朋友莫嫌多。」還細時節，跔等同學伴仔、鄰舍个細人伴仔弛崗打陣共下搞，滿哪仔都係佢兜共下行過个腳跡、看過个景色、搞過个生趣事，乜係佢兜盡懷念个童年。該兜生趣个回憶撈畫面，永久都會留在吾个腦膈肚。

¹ 紙擲仔：音 zii` biag e`；紙牌，指孩童時期玩的圓形紙牌，圖案多為卡通人物或電視、電影劇中人物。

² 毋修勢：音 m` cam se；形勢不好、情況對自己不利。

³ 翕：音 hib`；此指以言語威嚇或挑釁。

⁴ 草鞋搭：音 co` hai` dab；大灰枯葉蛾的幼蟲。

編號 2 號

【 佢曉搵手咧 】 廖惠貞原作

佢在屋下座大，阿姆講：「盡大个愛有好樣。」故所佢輒常帶等老妹共下學習、同大人搵手，阿婆講：「有緣正入共家門，一屋下人愛共心。」故所佢當聽話。

佢生到像大人恁高，毋過佢今年正十空歲仔定定，還係細人仔。屋下个大人有四儕，吾阿公、阿婆、阿爸摺阿姆。佢看世大人歸日仔愛上班賺錢，日日做到兩頭烏，還辛苦哪！細人仔當然愛多學做兜仔事情較好哪！

從細佢就好在灶下看阿姆煮食，佢對一年生開始，就會同大人搵手。阿姆煮菜、佢煮湯，兩儕人歡喜个鼻等香氣，七手八腳、就有好出菜也；阿爸講佢恁乖，老妹摺佢搭手，佢越學就越快樂！佢也盡好跔阿婆去市場，市場係鬧熱又生趣个所在，做得認識當多東西，尤其係青菜，像苦瓜摺番瓜係愛掛皮煮个，菜瓜摺瓠仔就愛刨皮，芹菜係食莖个，番薯葉、芥蘭菜个葉仔摺莖都做得食，笏瓜仔¹洗淨就食得，蔥仔、蒜仔仰般分，這兜全部都係佢在買菜个時節學著个。

¹ 笏瓜仔：音 ned` gua` e`；小黃瓜。

每日除忒搵做微毛末節个頭路，像：抹地泥、撿摯、收衫褲這兜，佢還會學煮飯。有一擺，吾姆出外，吾婆先愁便，佢就講：「阿婆！毋使愁，當晝佢來煮。」佢同米洗好，放入電鑊仔煮，堵好還有一鑊个爌肉²，就同佢放在瓦斯爐用炆火暖燒來，續等煎卵包、炒一盤薤菜，還煮咧一鑊包粟湯。佢也記得吾姆教過佢个：煮湯愛細義，毋好燒著！佢還有放芫荽仔³來敲香哦，兩下手就喊老妹好搵手排碗筷，過喊阿公、阿婆食飯哩！吾公、吾婆說佢講：「吾慈孫女大哩啲，還會唷！」佢自家也試著已沙鼻！

佢去到學校也會同先生搵手，因為佢係「細先生」。看先生歸日仔無閒泊杈，愛改一堆个字簿仔，故所佢會摺先生搵手，當晝頭就無歇睏。佢拿等紅色个筆，目珠擘金金檢查同學个字簿仔，毋著个位所就用紅筆箍起來，再過請同學改好來，也順續仔教一下毋曉得个同學，恁樣个頭路佢做毋會瘡，因為佢感覺有摺同學搵手著。

有一句話講「多學多得」，正經哦！佢學著當多，感謝吾个世大人分佢機會又信任佢，佢會繼續學習，佢也做得大聲講：「佢會煮飯哩啲！」

² 爌肉：音 kong` ngiug`；紅燒肉。

³ 芫荽仔：音 ien` xi` e`；香菜。

【蹶山】劉玉蕉原作

天官光，狗官吠，阿姆就在該咻哩！「阿榮啊，好跣哩，日頭愛出來哩啲！」

「阿珍妹，遽遽著鞋啲，愛出門哩啲！」

天甫甫仔光，日頭還在該睡目，佢兜一屋下人就目擘擘仔起腳行，共下去蹶小中崙山哩。路狹狹仔，草面頂个露水官散，分佢兜个腳徑啊著，就歸串歸串碾落地泥，一粒一粒金皙皙像珍珠樣仔，靚到耐毋得！吾心肝肚偷偷想：若係用佢兜來串一條珍珠骹鍊，送分阿姆戴，毋知幾靚仔哦！

涼爽个風，一陣一陣吹來，路脣个花花草草，分佢吹到搖頭拗腰，領頭行禮，就像該戲臺面頂，煞猛表演个大明星共樣。行到山下，老妹湊佢拚輸贏，看麼人先跋上山崙頂去。兩儕就恁樣頭磬磬，麼人都毋認輸，相爭拚往上。佢座大當然輸毋得，歸路毋敢停跔，鼻噴噴大氣緊啟，直直拚上山，蹶到山頂，撇等心臟，佢斯跳到硬硬像愛恬忒樣仔哦！

「哇！山頂个風當涼呢！」看往下，老妹還在半山排，厥个面頰卵紅啾啾仔，佢看哪，廟肚个關公都無佢恁紅哦！一張嘴擘

啊擘仔，又像細狗仔啟氣，實在還古董，還好笑！

山頂个風，特別清，特別涼爽，風裡肚有東勢果子个香氣，有花花草草个清甜味緒，這風吹到人歸身仔鬆爽，吹到人透心涼，進前蹶山个艱苦，到這下也做下毋記得也！樹頂絡食个鳥仔嘰嘰啾啾¹，跳上跳下叫無停，草竇个蟲仔毋願輸佢，也唧唧滾應聲。打早，山頂就恁仔鬧熱濟借哩！眺望該山下，遠遠个東勢，到今還蒙等一層紗，在濛沙煙裡肚睡到毋知好醒呢！

「遽遽，大家看！還靚哦！」

東片个雲像打吡粉樣仔，紅霞紅霞。紅霞退忒，係千條萬條个金色光，對山仔个後背射出來，無幾久，一粒大火球，就對山頭跳出來哩，晟到人擘毋開目，晟到濛紗遽遽隱身。日時頭个事頭，對這下正正式起勢呢！

企在山崙頂，佢兜放勢牯享受打早个光景，登高眺望个開闊視野，使人心情快樂，分人知得感恩，感恩大自然賜分佢人恁仔个好環境。阿爸長透講：「早跣床个鳥仔就有蟲仔好食。」到這下，佢總算體會著這句話个意思哩！

¹ 嘰嘰啾啾：音 ji ji jiu jiu；狀聲詞。形容鳥鳴聲。